

dum viueret, & muneris dignitate & summorum erga me meritorum copia venerabilem, quem luctuosissima morte, mense Iulio superioris anni, mihi ereptum valde & ex animo lugeo. Matrem colo ANNAM MARIAM, natam ELVERAM, quam ad summae vegetaeque senectutis limites inter largissima omnis prosperitatis munera summum ducat Numen! His Ducibus & horum sub oculis, cum non solum sanctissimae religionis, sed & humanitatis prima elementa accepissem, scholae patriae traditus sum, in qua cura Virorum Clarissimorum, GERMINI, MATTH. SCHMIDII & IO. WIDAE teneram aetatem optimis praeceptis erudiuit. Posthac Gymnasii ciuibus adscriptus & disciplina CASP. RVETZII V. C. bene praeparatus, audiui Viros praestantissimae eruditionis fama celeberrimos, SEELENIUM, LANGIUM, BEHRENDTIUM, OVERBECKIUM, quibus omnibus multum me debere ingenue profiteor. Daturus aliquod studiorum specimen, IMP. AVG. FRANCISCO, Imperiale solium ascendenti, deuotissimam pietatem publica oratione testatus sum, cui solennissimae panegyri singulari programme, *Ius Caesareum e Pandectis sacris delineatum* exhibente, prolusit iterum honoris causa nominandus a SEELEN. Exacto hoc curriculo, carissimi nunc cheu! desideratissimi Patris auctoritate, verno An. XLVII. tempore abitum ad Academiam, legitimae potissimum scientiae addiscendae causa, parare iussus, patrio Gymnasio, habita *de Ictis iustitiae sacerdotibus*, occasione L. I. D. de I. & I. oratione, vale precatus sum. Non poterat non ad suas me Musas allicere Vniuersitas *Georgia Augusta*, & optimarum artium cultu & Virorum vndiquaque eruditissimorum numero florentissima. In hanc itaque, salutata in itinere Regia vrbe *Hanouera*, in qua aditum, mihi ad Viros quosdam & munerum amplitudine & doctrinae laude splendentes patefecerat Illustris Patroni Lubecensis beneuolentia, d. XII. Apr. saluus sospesque concessi. Fasces tunc temporis tenebat Ill. & Gen. DE HALLER, qui